

EKALESIA FAAPOTOPOTOGA KERISIANO I AMERIKA SAMOA
OFISA O A'OA'OGA KERISIANO



VASEGA FEOLOOLO



Ianuari - Iuni

2020

FAASOLOGA O MATAUPU

MASINA	MATAUPU	TUSI FAITAU	ITULAU
FEPUARI 02, 2020	“ SA FAIA E LE ATUA LE LALOLAGI MATAGOFIE	KENESE 1:1-31&2:1-25	1-2
FEPUARI 09, 2020	“O LE ASO AUPITO SILI ONA FA’ANOANO O LE LALOLAGI “	KENESE 3: 1-24	2-3
FEPUARI 16, 2020	“O LE ULUA’I MISA I TOTONU O SE AIGA”	KENESE 4: 1-16	3-5
FEPUARI 23, 2020	“ SUEGA MUAMUA” -----		5-6
MATI 01, 2020	“UA AUMAI E MOSE LE NU’U O ISARAEU MAI AIKUPITO”	ESOTO 3:1-22	6-7
MATI 08, 2020	“ MOSE MA ISARAEU I LE VAO I TAUSAGA E FASEFULU”	ESOTO 19 & 20	7-9
MATI 15, 2020	“ UA FILIFILIA IOSUA E FA’AAUUAU LE TA’ITA’INA O LE NU’U I KANANA”	IOSUA 1: 1-18	9-10
MATI 22, 2020	“O LE AMIOTONU, O LE AMIO FA’A-LE-ATUA”	AMOS 2: 6-16	11-12
MATI 29, 2020	“ SUEGA LUA” -----		12-13
APERILA 05, 2020	“ ASO SA LAUPAMA”	MAREKO 11: 1-10	13-15
APERILA 12, 2020	“ O IESU MANUMALO”	MATAIO 28: 1-8	15-16
APERILA 19, 2020	“ O SO’O E TO’ALUA I LE ALA I EMAU”	LUKA 24: 13-35	16-18
APERILA 26, 2020	“ SUEGA TOLU” -----		18
ME 03, 2020	“ E LE’I TU’ULAFOA’IA E IESU LONA AU SO’O”	LUKA 24: 36-53	18-19
ME 10, 2020	“ O RA’AVA LE TINA NA LILIUINA LONA LALOLAGI ONA O LONA FAATUATUA	IOSUA 2:1-24	20-21
ME 17, 2020`	“ UA TU’UINA ATU IA PETERU LE GALUEGA”	IOANE 21: 15-19	21-22
ME 24, 2020	“SUEGA FA “ -----		23
ME 31, 2020	“ E LASI AUALA O LO’O GALUE AI LE AGAGA I TOTONU IA’I TATOU (ASO SA PENETEKOSO)”	GALUEGA 16: 6-10; 1 KORINITO 12: 4-5	23-25
IUNI 07, 2020	“ UA SAILI MAI LE ATUA I LE TAGATA E ALA I LONA ALO”	IOANE 10: 10-18	26-27
IUNI 14, 2020	“ O LE ALOFA FA’A-LE-ATUA E TUTUSA AI TAGATA UMA “	LUKA 15: 1-7	27-28
IUNI 21, 2020	“ O LE TA’ITA’INA FA’ATAMĀ” (ASO SA O TAMĀ)	II SAMUEL 13: 23-39	28-29
IUNI 28, 2020	“ SUEGA MO LE AFA MUAMUA” -----		30

**IA TA’ITA’INA PE A LE AGAGA O LE ATUA LA OUTOU GALUEGA FAA-FAIAOGA ASO SA!
INA IA MAUA PE A MANATU MA LAGONA E FA’ATINOINA AI LE GALUEGA LE FAIGOFIE, IA MANUIA
FA’AMOEMOEGA UMA O LE A FEAGAI AI.**

VAEGA I: O LE AMATAGA O LE LALOLAGI MA NISI MEA NA TUTUPU AI.

Fepuari 02, 2020

Mataupu I: “SA FAIA E LE ATUA LE LALOLAGI MATAGOFIE.”

Tusi Faitau: Kenese 1:1-31 & 2:1-25

Sini: Ia iloa e tamaiti po’o a mea na faia e le Atua e iloa ai o se lalolagi matagofie o lo’o tatou ola ma nonofo ai.

Fesoasoani mo le Faisiaoga:

O lo’o i lau susuga lava le lelei ma le atoatoa o le fa’amatalaina o le mataupu, ae o tusi faitau ua tu’uina atu, e mo lau tapenaga ae pule lava lau susuga i ni vaega o tusi faitau ia e lua e faitau e le fanau. Ua saunia foi le manatu aoao o lo’o i luga e taula’i uma i ai mataupu o lenei masina, o le taumafaiga lava ina ia feso’ota’i mataupu uma, ina ia faigofie ona malamalama le fanau pe a fa’amatala e lau susuga i le faisiaoga. Ia manuia lau tapenaga.

Fesoasoani mo le mataupu:

1. O le uiga o le upu “Kenese” o le amataga, o lona uiga, o fa’amatalaga uma o lo’o ta’ua i le Kenese o mea sa ulua’i faia e le Atua i le amataga. O le Kenese lā, o tala o le foafoaga a le Atua. E ese’ese fa’amatalaga a le mataupu muamua ma le mataupu e lua i le fa’agasologa o galuega ma mea na faia e le Atua. E o’o foi i le taimi sa fausia ai le tagata, i le Kenese 1, o le tagata lava sa fa’atoā faia i le aso ono, le aso mulimuli, ona malolo ai lea o le Atua mai ana galuega i le aso 7. O le tala fo’i a le Kenese 1, sa faia e le Atua le tane ma le fafine i le taimi e tasi.
2. O le fa’amatalaga a le Kenese 2, o le galuega muamua lava a le Atua, o le fausia lea o le tagata i le efuefu ma le ele’ele, ona manava lea i ai o le Atua i ona pogaiisu, o le manava ola, ona avea ai lea o le tagata ma tagata ola. Ona soso’o lea ma le faia o le fa’atoaga i Etena, o laau, o manu felelei ma manu vaefa, atoa ai ma i’a o le sami ma mea fetolofi, ae fa’ai’u i le fa’atoā faia o le fafine i le ivi asoaso na toina mai ia Atamu.
3. E lē taua le ese’esega o fa’amatalaga o tala nei e lua o le foafoaga a le Atua. A’o le mea taua o lo’o i ai i nei tala e lua, ua ta’u mai ai ia’i tatou, “sa galue le Atua ina ia faia se lalolagi matagofie.” A silasila i le Kenese 1:2 & 2:5-7. Fai mai sa so’ona nunumi le lalolagi ma ua gaogao, o le moana foi sa ufitia i le pogisa. O le laueleele foi foi sa le tupu ai se vao po’o se laau, a ua na o le ausa ua alu a’e mai i le ele’ele. O lona uiga, e ta’u mai ia’i tatou e ia fuaiupu, o se lalolagi matagā sa i ai muamua a’o le’i galuea’ina e le Atua ina ia matagofie. E ala ona matagā auā sa so’ona nunumi ma pogisa.
4. A ofu mai se tamaititi i se ofu ma’anuminumi toe palapalā e leai lava ma se isi o tatou e fia sōsō i ai, e lē fia vaai foi se isi i ai. E fa’apena fo’i i mea pogisa, e lē mafai lava e se tamaititi o tatou ona fia nofo ai. E fa’apena foi lagona o le Atua i le amataga. Sa silasila o ia i se lalolagi ma’anuminumi ma le pogisa, ona manatu lea o le Atua o se lalolagi matagā ma le lē lelei i lana silasila, ma e tatau ona faia ia matagofie.

Fesili fa'atupu manatu

1. O le a sou manatu, o tumau pea le matagofie o le lalolagi e pei ona ulua'i faia ai e le Atua?
2. Pe finagalo le Atua ia tatou fa'aleaga le lalolagi matagofie na ia faia mo oe ma a'u?
3. Pe toe fia silasila le Atua i se lalolagi ma'anuminumi matagā ma le pogisa?
4. O le ā la se feau ua aumai e le Atua mo oe ma a'u, pe afai o le tagata ua tu'u i ai le pule. Ae o le a foi lou tiute ma sau galuega e tatau ona faia i le lalolagi na faia e le Atua moi tatou?

Galuega Fa'atino:

1. Fa'amolemole lau susuga i le Faiaoga, ia matuā fa'amalosi i tamaiti le fa'aogaina o le api ma le peni i le tatou galuega fa'atino, ina ia saunia ai latou mo suega i masina ta'itasi.
2. Manaia foi ae tusi pe ta foi i le pepa fesili, ae tali mai e tamaiti i se parakalafa e tasi, e toe fa'amatala mai ai po'o malamalama pe leai.

Pese # 8...mai le tusi pese

Tatalo: Saunia e lau susuga se tatalo e fa'ai'u ai le vasega.

IA MANUIA TELE LE ASO SA.

Fepuari 09, 2020

Mataupu 2: "O LE ASO AUPITO SILI ONA FA'ANOANO A O LE LALOLAGI."

Tusi Faitau: Kenese 3: 1-24

Sini: Ia iloa e tamaiti pe aiseā ua fa'anoano ai le lalolagi.

Fesoasoani mo le Faiaoga:

Malo le tapena fa'afetai saili, o le auga lava o lenei fa'amoemoe, o le tatou so'oso'o tau'au pea i lenei galuega le faigofie. E lelei lava ona matuā fa'amamafa le faitauina o le tatou tusi faitau ina ia o tutusa ma se fesoasoani ua tu'uina atu, ina ia faigofie ona fa'amatala le mataupu a le fanau. Ia manuia tele lau tapenaga.

Fesoasoani mo le mataupu:

Sa faia e le Atua se lalolagi matagofie i le amataga e pei ona ta'ua i le mataupu muamua. O meaola uma foi sa faia e le Atua ma tu'u i le lalolagi, sa nonofo, tata'a ma sa ola fiafia auā sa faia uma e le Atua mea uma e fetau ma lo latou mana'o. Sa faia foi e le Atua le tagata ma ua ia tu'u i ai le pule i mea uma o le foafoaga e ola ma fiafia ai, ma le fa'atonuga lava e tasi, "a'o le laau lava e tasi e iloa ai le lelei ma le leaga, aua e te 'ai ai, auā o le aso e te 'ai ai e te oti ai lava."

Sa soifua fiafia Atamu ma Eva i le lalolagi matagofie a le Atua i le amataga, ae peita'i ina ua le usiusita'i i laua i le fa'atonuga a le Atua, ua la a'ai lava i le laau sa fa'asaina mai e aua ne'i a'ai ai, ona avea ai lea o lea aso, le aso na la soli ai le tulafono a le Atua, ma aso aupito sili ona fa'anoanoa o mea uma oi le lalolagi.

O le "lē usiusita'i" o Atamu ma Eva, o le gaiouga muamua lava lea a le tagata, ua fa'aleaga ma fa'amatagaina ai le lalolagi matagofie sa faia e le Atua i le amataga. O le finagalo lava ia o le Atua sa fausia ai le lalolagi matagofie ina ia tumau lona matagofie.

Ua fa'anoanoa le lalolagi ona ua avea le lē usita'i o Atamu ma Eva, ua le tumau ai le matagofie o le lalolagi e pei ona ulua'i faia ai e le Atua. O le lē usiusita'i foi o Atamu ma Eva, o le agasala lava lea auā ua la fa'ataute'e i le fa'atonuga a le Atua a ua fai lava o la loto, ma ua avea lo la lē usiusita'i ma auala mai o le oti i le tagata ma mea uma o le foafoaga a le Atua. Ua le o toe tumau nei le matagofie o le lalolagi auā ua ofi mai le agasala ona o le lē usiusita'i o Atamu ma Eva, ma ua fai nei ma fa'aleaga mea i le lalolagi aemaise lava le tagata o le paleali'i o galuega o le foafoaga a le Atua.

A'oa'oga: Tamaiti, o le taimi leni o tou augā tupulaga tou te tula'i mai ai, ua le'oe toe faigofie le ta'aviliga o le lalolagi ma le tele o suiga fou fa'aneionapo, ma ua atili fa'aleagaina ai le lalolagi. A'o le mea taua ia'i tatou ia tatou ola usiusita'i i Matua, auā o lou usita'i i Matua, o lou usita'i lava lea i le Atua.

Galuega Fa'atino:

1. Ia tu'u le avanoa i tamaiti e fa'amatala mai ai po'o a ni suiga fou ua atili fa'aleagaina ai le lalolagi i leni vaitau.
2. Fa'amatala mai ma tusi mai po'o a ni fa'afitauli ogaoga ua a'afia tele ai tupulaga i leni vaitau.
3. O le a le tatou galuega e fai ina ia fa'aititia ai fa'afitauli ma fa'atumau le matagofie o le foafoaga.

Pese #134, ia usu le fati e maua uma e tamaiti ma ia fa'amasani pea i pese mai le tusi pese.

Galuega e fai le fale:

Ia ta'u i tamaiti le tusi faitau o le mataupu o le Aso Sa e soso'o ai, ina ia o e faitau ma sailiili ai foi latou mo le mataupu.

Tatalo: Saunia e se tama'ita'i.

Malo lava mo le tapenaga, ia manuia tele le sauni atu mo sauniga o le Aso Sa.

Fepuari 16, 2020

Mataupu 3: "O LE ULUA'I MISA I TOTONU O SE AIGA."

Tusi Faitau: Kenese 4: 1-16

Manatu Fa'amamafa: Ia iloa e tamaiti pe aiseā na masesei (misa) ai Kaino ma Apelu.

Fesoasoani mo le Faiaoga:

Malo lava le tapena i lau susuga i le Faiaoga, talitonu o lo’o sologa lelei pea au tapenaga. O le tusi faitau lava le malosiaga o le mataupu, ia lava lou taimi e te mafuta ai i le tusi faitau, ina ia faigofie ona malamalama atili le mataupu. Ia manuia tele lau tapenaga mo le mataupu.

Fesoasoani mo le Mataupu:

O lo’o ta’ua i le mataupu muamua ma le lua, se lalolagi matagofie sa faia e le Atua i le amataga, a ua avea le lē usita’i o Atamu ma Eva ma avanoa o le agasala ua ofi ma ii le lalolagi, ma amata ai ona fa’aleagaina lona matagofie e pei ona ulua’i foafoaina ai e le Atua.

O le tala ia Kaino ma Apelu, ua tatou iloa ai le ofi mai o le agasala i le tagata ma ua atili fa’amatagaina ai le lalolagi matagofie a le Atua, ona ua talia e le ulua’i tagata le fa’aosoosoga a ua tete’e i le Afioga a le Atua.

O le tala foi ia Kaino ma Apelu o le a tatou iloa ai le mata’utia o le ofi mai o le agasala i le lalolagi auā ua matala le faitoto’a i le fa’aosoosoga talu lava le ulua’i tagata.

O le misa i totonu o se aiga po’o le va o uso, o le tasi foi lea la’asaga matagā ua atili fa’amatagaina ai le foafoaga matagofie a le Atua, aemaise lava o le tagata na faia i le fa’atusa o le Atua.

E finagalo le Atua i le alofa ma le fealofani, a ua tatou iloa nei ia Kaino, ua una’iina pea e le fa’aosoosoga ina ia fa’atupu le misa ma o’o ai ina faia le agasala e sili ona mata’utia, o le “fasioti tagata”.

O lagona sa o’o ia Kaino ina ua ia ioeina le fa’aosoosoga, sa ia fa’atupu se leaga i le la va ma lona uso, ma o’o ai lava ina fa’ataunu’u le oti ia te ia. A silasila i lagona uma na tutupu a’e i le loto o Kaino ona ua le silasila le Atua i lana taulaga, ua matuā leai lava se avanoa o le Agaga o le Atua, ae ua pule ai le fa’aosoosoga.

1. Ua tigā le loto – o lona uiga ua pulea e satani.
2. Loto leaga – e tupu foi ona ua pulea e satani.
3. Fia Sili – e mafua ona ua tosina le mafaufau i le fa’aosoosoga.
4. Le Usiusita’i – ia o le faitoto’a lena o le o’o mai o le agasala, na matala pe sa tatala e Atamu ma Eva, lea foi ua manumalo ia Kaino.
5. Fasioti tagata – o le fa’atinoga lena o le manumalo a’ia’i o le fa’aosoosoga ia Kaino, o le fa’ataunu’uina foi lea ona fai o le soli tulafono.

O le tagata lava ia sa faia e le Atua i le atoatoa, lelei ma le matagofie auā sa faia i lona fa’atusa paia. O le fa’aosoosoga leaga ua leva lava ona i ai i le lalolagi, o lo’o taoto i le faitoto’a o tatou loto, peita’i, e lē pule le fa’aosoosoga ia’i tatou, o oe ma a’u e pule i le fa’aosoosoga leaga. O le agasala, e o’o mai ina ua tatou ioeina le fa’aosoosoga leaga i o tatou loto. O le loto ita, loto leaga, fia sili ma le lē usiusita’i, o fa’aailoga uma na o le tagata ua ia fa’atagaina le fa’aosoosoga e pulea lona loto ma o’o ai ina ta’ita’ina le tagata ia faia le agasala. O le agasala lava ia ua ofi mai

i le lalolagi ina ua to'ilalo popo le ulua'i tagata i le fa'aosoosoga, ma o lo'o taoto nei le agasala i lou faitoto'a i taimi uma, e ua'i mai foi lona mana'o ia te oe, peita'i, "o oe e te pule ia te ia".

Galuega Fa'atino:

1. Manaia ae toe tusi uma i se pepa vaega o lo'o ta'ua i le mataupu po'o lagona foi na o'o ia Kaino, ona fa'amatala mai lea e tamaiti i latou lava upu, ona silasila lea iai o lau susuga po'o talafeagai ma uiga o lo'o ta'ua i le mataupu.

Pese: E le matalasi...o lenei olaga.

Tatalo: Ia u'ulima fa'atasi ma tamaiti ma fa'apea atu; Lo matou Atua e, o oe lava o le malosi silisili ese, e te pulea foi mea uma o lenei lalolagi, e te mafaia foi ona faia o so'o se mea matou te manana'o i ai, fa'afetai i lou alofa mai ia tei matou. AMENE.

IA MANUIA TELE LENEI ASO SA!!

.....

Fepuari 23, 2020

Mataupu 4: SUEGA MUAMUA

Fesoasoani mo le Faiagoa:

Pule lava lau susuga i le Faiagoa i le faiga e fai ai fesili, ae lelei lava pe a ta i ni pepa ma ia tufaina i tamaiti. Ia aoina uma foi pepa tali a tamaiti ma ia togi ia sa'o, a uma ona toe tufa lea i ai o a latou pepa e va'ava'ai i ai, a ia fa'amaumau e lau susuga togi a tamaiti. Ae manaia foi pe a saunia e tou susuga i Faiagoa, ni nai fa'ailoga mo le ogatotonu po'o le fa'ai'uga foi, ina ia una'ia pea loto o le fanau e sagisagi mai i le Aoga Aso Sa. Pe a tusa ai ma lou finagalo.

FESILI:

1. Se'i ta'u mai po'o a mea sa fausia ai e le Atua le lalolagi?
2. E fa'apefea ona e iloa e matagofie le lalolagi sa foafoaina e le Atua i le amataga?
3. O le a sou manatu, pe aisea ua fai mai ai le tagata o ia o le paleali'i o galuega a le Atua?
4. Aiseā na fa'anoanoa ai le lalolagi?
5. O le a le mea na faia e Atamu ma Eva ua matagā ai le lalolagi?
6. E pule le agasala ia te oe pe pule oe i le agasala?

7. E mafua ea aiseā misa?
8. O le a se mea na tupu tatou te iloa ai le lalolagi ua matuā eleelea?
9. O le a la se feau taua ua e maua mai i tala o le foafoaga?

Malo lava le sailiili fa’afetai le tapena mo mataupu o lenei masina, ia fa’ai’u i se pese ma tofi se alii e fai se tatalo e fa’ai’u ai le vasega.

Ia manuia tele lenei Aso Sa!!

VAEGA II: O LE ALOFA FA’AALI O LE ATUA I ONA TAGATA.

Mati 01, 2020

Mataupu 5: “UA AUMAI E MOSE LE NU’U O ISARAEU MAI AIKUPITO.”

Tusi Faitau: Esoto 3: 1-22

Sini: Ia iloa e tamaiti pe sa fa’apefea ona fa’asa’olotoina mai Isaraelu mai le pologa sa i ai i Aikupito.

Fesoasoani mo le Faiaga:

Malo lava le onosa’i i lau susuga i le Faiaga, lea ua tau mai le fa’asologa o tatou mataupu i le vaega lona lua o le tatou tusi. O le tusi faitau lava ia lava le taimi e faitau ai e le fanau ma ia malamalama lelei i ai, auā o le ta’iala lea e manino atili ai le mataupu. Ia manuia tele lau tapenaga mo le mataupu.

Fesoasoani mo le Mataupu:

Faitau (Kenese 15: 12-16). Ina ua uma ona fa’amanuia le Atua ia Aperamo fa’atasi ma nisi o ana folafolaga i mea o le a o’o ia Isaraelu i le lumana’i.

E aumau lau fanau i le nu’u ese, e nofo pologa foi i latou ia te’i latou, e fa’atigaina i latou e i latou, o tausaga ia e fa selau. (Kenese 15: 16)

O le nu’u foi latou te nofo pologa ai ou te fa’asalaina, mulimuli ane latou te omai ai ma le oloa tele.

O le fesoasoani ua ta’ua muamua mai i le Kenese, e fa’apupula mai ai, o le Atua lava, sa ta’ita’ina Isaraelu ina ia fa’apologaina, o le Atua foi, o ia ma le malosia o lona Mana ua fa’asa’olotoina mai ai Isaraelu.

Ua o’o nei i ona po sa tu’upoina e le Atua e tatau ai ona fa’agata le amo o le pologa e lona nu’u (Isaraelu) ae foi mai i le nu’u sa folafolaina ia Aperamo e fai mo latou nu’u ma auauna atu ai i lo latou Atua. O Mose lā, o le auauna sa valaauina e le Atua na te ta’ita’i maia Isaraelu mai Aikupito i le mea sa nofo pologa ai.

O Mose lava ia, ua na’o se auauna tagata, peita’i ua fa’aogaina e le Atua e fai ma ona fofoga e fa’ailoa ia Farao ma Aikupito uma lona finagalo ma le Silisili Ese o lona Mana. Sa fa’aogaina foi e le Atua Mose e fai ma ona a’ao e fa’aalia lona silisili ese, i ana vavega mata’utia sa faia i luma o Farao ma Aikupito uma.

(Esoto 3: 19-20), O nisi nei o fuaiupu, o lo’o fa’aalia ai toe a’oa’oga ma Afioga a le Atua ia Mose lana auauna mo le fa’ataunu’uina o lona finagalo. A silasila i ia fuaiupu, e iloa ai o le Atua lava ua ia silafia mea uma, na o’o foi lona lima malosi ia Farao ma Aikupito.

Mataupu ia o lo’o tatou iloa ai le fa’aalia o le silisili ese o le mana o le Atua e ala i ana auauna o Mose ma Arona sa fai ma fofoga ma a’ao o le Atua i luma o Farao, e ala lea i le faia o vavega. O lo’o ta’ua foi o “Ia” lava na te fa’amaa’aina le loto o Farao ina ia fa’aalia atili ai le tele o ana vavega e pei o fa’ama’i po’o mala foi e sefulu sa ia fa’ao’o ia Aikupito.

Mulimuli ane, ona tu’uina mai lea o le nu’u ia Mose ina ia o ese, auā o le Atua lava na ia fa’atupu le alofa i loto o Aikupito ina ia latou foa’i mea uma e pei ona ole atu ai le fanauga a Isaraelu.

Galuega Fa’atino:

Fa’amolemole lau susuga i le Faaiaoga, ia fai i tamaiti e tusi mai po’o le a le uiga o le fuaitau o lo’o i le tusi faitau, “**o lo’o mu lava le laau talatala i le afi, ae le’i fa’aumatia le laau talatala**”.

Pese: Mose, Mose e, tatala ou se’evae

Ua sa le mea nei ona e tu ai.

Le Atua o Aperaamo,

Le Atua o Isaako ma Iakopo x2.

Malo lava fa’afetai mo le galuega mae’ae’a i lenei Aso Sa, ia tofi ane e lau susuga se isi e fa’ai’uina le mataupu i se tatalo.

IA MANUIA LE ASO SA!!

.....
Mati 08, 2020

Mataupu 6: “MOSE MA ISARAELU I LE VAO I TAUSAGA E FASEFULU.”

Tusi Faitau: Esoto 19 & 20

Sini: Ia iloa e tamaiti le mafuaaga na ala ai ona tu’u e le Atua Isaraelu i le vao i tausaga e tele.

Fesoasoani mo le Faaiaoga:

Malo lava le sauni mo mataupu a le fanau, o lo’o tatou fa’aauau pea i mataupu e tusa ai foi o le faitauga o lenei masina. O le agaga maua luga lava o lo’o taumafai atu ai, ia mautu pea i mafaufau o le fanau le fa’asologa o tala o le Tusi Paia. Ia manuia lau galuega i lenei Aso Sa.

Sina fesoasoani mo le Mataupu:

1. A tatou sailiili i le tala-fa'asolopito o Isaraelu o lo'o fa'amauiina i le Tusi Paia, mai i le foafoaga e o'o atu i le Esoto (Exodus) taimi na o ese mai ai i Aikupito. I le Kenese 12, 15, 17: o lo'o iloa ai le feagaiga osia fa'atasi ai ma le folafolaga a le Atua ia Aperaaamo i mea uma o le a tutupu i le lumana'i.
2. Aperaaamo o le tupuga o se nu'u tele (Jews) Isaraelu, ma o Isaraelu na te fa'ailoa i le lalolagi le silisili ese o le Atua. O Isaraelu ua filifilia e le Atua o se mea faigaluega e fa'ailoa ai i le lalolagi lona Finagalo. O folafolaga a le Atua ia Aperaaamo o le a ia saunia foi ma filifili se laufanua lelei ma le lafu lemu mo ana fanau (Jews). Ae le gata foi i lena, o tagata Isaraelu o le a fanau mai ai se lagona pe o le a fa'ailoa mai ai i le lalolagi, le Mesia (Christ) o le a fa'amanuiaina tagata uma.
3. I le taufa'ai'uina o le tala a le Kenese, o lo'o iloa ai le amata ona fa'ataunu'uina o lena folafolaga. Ua fanau Isaako – Iakopo le na suia lona igoa ia Isaraelu. O lo'o ta'ua foi, o le Atua lava na ia ave Iosefa i Aikupito ina ia saunia se nofoaga o Isaraelu i Aikupito e nonofo ai ma fa'atuputeleina ai. A silasila i ai i le tala a Kenese, e silia ma le faselau po'o le faselau foi tausaga talu ona nonofo ai le nu'u o le Atua i Aikupito. Sa o'o ina ua oi ma pologa le nu'u i le mamafa o avega i lalo o le pule sauā a Aikupito. Ua o'o foi le leo o a latou tagi i le Atua, ona tofia lea e le Atua o Mose na te ta'ita'i ese mai Isaraelu mai Aikupito.
4. Mose o se ta'ita'i na saunia lelei e le Atua na te ta'ita'i ese ina mai Isaraelu mai Aikupito. O Mose foi, sa fai ma sui o le Atua e fa'ailoa ia Farao lona Finagalo ma lona mata'utia. O le aveeseina mai la o Isaraelu, e le o se malosi po'o se poto o Mose, a'o le malosi o vavega mamana a le Atua na tu'uina ia te ia. Ina ua mavae le fa'aumatiaina o au a Aikupito i le sami ulaula, ona sopoia atu lea e Isaraelu le sami aga'i atu i le vao ma le pese o le alaga fiafia, o le viiga i le Atua ona o vavega mata'utia ua ia faia, ua fa'asaoina mai ai le nu'u mai Aikupito.

Galuega Fa'atino:

Ia tufa pepa i tamaiti ma fai i ai e tusi mai Tulafono e sefulu, ma ia fa'atulaga sa'o i le fa'asologa mai lava i le Tulafono muamua e o'o i le sefulu, ona siaki lea e tou susuga po'o sa'o, ae pule lava outou i le aofa'i o togi e tu'u i ai.

Pese: A ia e tau malosi tete'e i le fili
Aua lava ne'i e fa'avaivai
A ia e tau ma le Ali'i o 'au
E aoga e tutumau.

Tali: Ou te tumau ma pipi'i mau x2
Le lalolagi e taumafai e liliu ese a'u
Ou te tumau ma pipi'i mau.

Tatalo: Ia tofi se tama e fa'ai'u le vasega i se tatalo

Mati 15, 2020

Mataupu 7: “UA FILIFILIA IOSUA E FA’AAUAU LE TA’ITA’INA O LE NU’U I KANANA.”

Tusi Faitau: Iosua 1:1-18

Sini: Ia iloa e tamaiti pe aiseā na filifili ai e le Atua Iosua na te ta’ita’ia le nu’u i Kanana.

Fesoasoani mo le Faaoga:

Malo lava le su’esu’e mo lau tapenaga, ia o le mataupu o lenei taeao ia e taoto atu lava i lau susuga mo le fa’amatalaina. Ae manaia foi ae fai muamua ni nai fesili e fa’atautu i agava’a o le tagata e mafai ai ona avea ma ta’ita’i, ina ia tatala ai mafaufau o le fanau e faigofie ai foi ona fa’apupula atili le mataupu. Ia manuia tele lau tapenaga.

Fesoasoani mo le Mataupu:

Sa finagalo le Atua i se ta’ita’i e sui i lana auaua o Mose, se ta’ita’i e mautinoa e ola ma galue, se ta’ita’i e gaoioi lava e fa’ataunu’u lana upu. Se ta’ita’i ua tele sona iloa ma malamalama lelei i laufanua po’o laueleele foi o Kanana, atoa ai foi ma nu’u o i tafatafa o Kanana.

O le filifilia la o Iosua e le Atua, e le o se filifiliga sa fa’atoā fai i se taimi pu’upu’u ina ua oti Mose. O le avea ma ta’ita’i o se sailiga umi, e mamao foi le ala e tatau ona tamo’e ai le tagata o le a fai ma ta’ita’i, a’o lena foi ala e tumu i su’esu’ega a le Atua, e su’e ai le tagata ina ia mautinoa e mafaia e lea tagata ona tauave le tulaga fa’a-ta’ita’i.

NISI NEI O MEA SA FAIA E IOSUA UA FILIFILIA AI O IA E LE ATUA E FAI MA TA’ITA’I NA TE FA’AO’O LE NU’U I KANANA.

1. Sa ta’ita’i e Iosua le vaega ‘au a Isaraelu e tau ma tete’e atu i au a Amaleka (Esoto 17:8-16).
2. O lo’o ta’ua foi i nisi fa’amatalaga, sa iai Iosua i le vaega ‘au (army) a Aikupito a’o i ai Isaraelu i Aikupito.
3. O lo’o ta’ua foi, na’o Iosua lava mai i le to’asefulu ma le lua lea sa tofia e Mose e ō fa’anānā e va’ava’ai i Kanana ma ta’u mai se tala, na foi mai ma le tala fiafia ua o gatasi ma le finagalo o le Atua.

Mai lenei vaaiga, ua iloa ai ua leai se vaipanoa o Kanana ua le iloa e Iosua. Fa’atasi ai ma lona talitonu i le Atua, e tu’uina mai lava e le Atua Kanana i o latou lima, o le ala lena o lana tali atu ia Mose ma le nu’u. O le tali mautinoa ma le talitonu i le Atua, “e tu’uina mai e le Atua le nu’u i o tatou lima i le aso nei.”

Sa fetalai le Atua ia Mose ia e tofia Iosua le atali’i o Nuno, pau lena o le tagata o lo’o i ai le agaga, ia fa’ae’e lou lima i luga ia te ia, ia e tu’u atu foi ia te ia i luma o Eleasaro le ositaulaga ma luma o le fa’apotopotoga uma, ma ia e sauni atu se upu ia te ia i o latou luma, ia e tu’u atu foi ia te ia nisi o lou mamalu, ina ia fa’alogo ai le fa’apotopotoga uma o le fanauga a Isaraelu. (Numerā 27: 15-20)

O fa'amatalaga uma ua ta'ua i luga, ua iloa ai ua tatau ma agava'a Iosua e avea ma ta'ita'i, auā ua tele lona masani ma mea tau taua, ma ua malamalama lelei foi i laufanua o Kanana. Ua ia te ia foi le Agaga o le Atua fa'atasi ai ma le mamalu sa ia Mose ua tu'uina ia te ia e pei ona fetalai ai le Atua i lana auauna o Mose.

A'oa'oga: Tamaiti, lea ua tatou fa'alogologo i leni taeao ma ua tatou manino ai, o le avea o Iosua ma ta'ita'i, o le tofiga mai le Atua. O le avea o se tagata ma ta'ita'i e le faigofie, ma e agava'a uma foi tatou i le tulaga fa'ata'ita'i, ae e i ai mea e ao ona tatou faia. E le pu'upu'u foi se taimi e tapena ai le tagata, e amata atu lava i le taimi e te ola mai ai e alu i le aoga ona fa'agasolo ai lea o lou olaga se ia o'o ina tagata matua. O le mea taua, o lou fa'amaoni ma tauivi i so'o se mea, e le gata o au mea aoga, o totonu o lou aiga ae fa'apea foi i le tatou Aoga Aso Sa ma le lotu. Ma ia outou iloa e amata lava ia te oe ona ta'ita'i muamua oe, ma ia e talitonu o le Agaga o le Atua e mafutaina au taumafaiga uma, ona mautinoa lea o le a avea outou ma ta'ita'i i le lumana'i.

Galuega Fa'atino: Ta'u mai po'o ai tagata nei, ae o a foi a latou galuega sa fai e tusa ai ma le tatou mataupu sa fa'amatalaina.

Mose –
Iosua-
Eleasaro-
Nuno-

Pese: Ia e ta'ita'i ia'i matou
I le ala faigatā, ma e fa'amalosi mai
Matou te ui tonu ai.
Tatou finau atu ia x 2

Tatalo: Le Atua alofa e, o oe lava o lo matou ta'ita'i sili, o lau ta'ita'iga lea ua matou aulia mai ai leni aso, aemaise o fa'amanuiga o le ola ua matou maua. Fa'afetai i lou fa'amanatu mai pea i a'i matou, o lau afio lava matou te mafaia ai so'o se mea matou te manana'o iai. Ona o lou lava suafa ua matou tatalo atu ai nei...Amene.

IA MANUIA LE ASO SA!!

Mati 22, 2020

Mataupu 8: "O LE AMIOTONU, O LE AMIO FA'A-LE-ATUA."

Tusi Faitau: Amosa 2:6-16

Sini: Ia malamalama le fanau, o le finagalo o le Atua o le faia lea o le amiotonu.

Fesoasoani mo le Faiaoga:

Malo lava le fa'apalepale i lau susuga i le Faiaoga i feau ma galuega o le vaiaso, o lo'o taoto atu lava le fa'atuatuga i le fa'amatalaina o le mataupu. Ae fa'amolemole lau susuga, e lelei lava pe a fa'atalatalanoa muamua tamaiti i le amio ma le olaga o aso nei, fa'atasi ai ma le tele o fa'afitauli ua tutupu mai ai. Ia manuia tele lau tapenaga.

Fesoasoani mo le Mataupu:

1. O le upu amiotonu (righteousness) o le amio e tonu ma sa'o, o le amio lea e finagalo le Atua e ola ai le Isaraelu. I le Esoto e 20-23, ua fa'amauiina ai tiute e tatau mo Isaraelu e fa'aalia ai le alofa i le tuaoi ma isi tagata, fa'atasi ai ma le amio paia i le va tapuia ma le Atua, ona ta'ua lea o i latou o tagata amiotonu. Na malamalama lelei Aмоса i le feagaiga a le Atua ma Isaraelu, fai mai le perofeta, "Ua na o outou lava ua ou iloa i aiga uma o le lalolagi." O lona uiga ua na o Isaraelu lava na filifilia e le Atua e fa'ailoa ai lona mamalu ma lona finagalo i le lalolagi, na tu'uina ai foi tulafono o le feagaiga ina ia ta'uamiotonuina ai i latou.
2. I le fuaiupu e 9-12, o lo'o fa'amanatu ai e Aмоса ia Isaraelu e lē mavae le amiotonu o le Atua ma i latou. Fuaiupu e 9, a'o le'i tulaueleele Isaraelu i le nu'u folafolaina, na au le Atua ma lona nu'u i le fa'ato'ilaloina o sa Amonī, o e na fa'alavelave ane i la latou malaga i le vao. I le fuaiupu e 10, o le amiotonu a le Atua lea na laveaina mai ai lona nu'u mai le pule sauā a Farao ma Aikupito. I le fuaiupu e 11, o lana amiotonu foi na fa'aalia i lona fa'atuatuaina o perofeta ma "naseri" e fa'amanatu pea ia Isaraelu o latou tiute e tatau ai i le tausia o le feagaiga.
3. O le "Naseri", o lē ua fa'apaiaina lona olaga mo le Atua. E sa ona fa'afugaina lona lauao, e sa ona tafieseina lana 'ava, e sa ona pa'i i se tagata oti, e sa foi ona inu i le uaina. Ona o'o mai lea i le fuaiupu e 12, ua le ususita'i ma lē mafaufau le fanauga a Isaraelu. Ua latou fouvale i le Atua ma lana amiotonu, ua fouvale foi i le feagaiga. Ua latou vavao perofeta ina ia aua ne'i o latou toe fa'amanatu atu i a'i latou le feagaiga ma ua latou fa'ainu uaina le au Naseri. Ua matuā leai lava se amiotonu i le nu'u, ma ua atili ai ona olopalaina tagata matitiva ma fafine ua feoti a latou tane.

A'oa'oga: Ioe, na valaauina e le Atua le perofeta o Aмоса e ave le feau i lona nu'u o Isaraelu, ona ua le amiotonu a latou amio ua fai. E naunau le Atua ina ia savavali lana fanau i ona ala ma ia faia le amiotonu. E fa'apea foi tatou, ua a'oa'oina i tatou i tala tau i le Atua ina ia tatou amio ai fa'a-le-Atua, o a la amio fa'a-le-Atua...o le amio lelei, ususita'i, fai le mea sa'o ma le filifili tatau, o mea uma ia e tatau ona maua i o tatou olaga i aso uma. E mafai ona tatou maua mea uma ia pe a tatou mafuta i le Atua i le tatalo, ae tatou 'aloalo ese i le fai o amio sēsē, auā e o'o mai ai le to'asā o le Atua ia'i tatou.

Galuega Fa'atino: Fa'amolemole ia fa'aoga pea le api ma le peni.

1. Aiseā na to'asā ai le Atua ia Isaraelu?
2. O ai le igoa o le perofeta na auina e le Atua e ave le feau i lona nu'u?
3. O le a le uiga o le "Naseri"?
4. O le a la se feau po'o se a'oa'oga taua mo tatou i le vaitau lenei ua tatou i ai?

PESE: Faitau le Tusi Paia ma tatalo i aso uma
Tatalo i aso uma, tatalo i aso uma
Ona e tuputupu ai lea x2.

Ia fa'amanatu i tamaiti le suega i le Aso Sa e soso'o ai, ina ia sauniuni ma sailiili i mataupu uma o lenei masina o le a fai iai le suega. Ma ia fai se tatalo e fa'auma ai le vasega.

IA MANUIA LE ASO SA!!

.....
Mati 29, 2020

Mataupu: SUEGA LUA

Fesoasoani mo le Faiaoga:

Malo lava le onosa'i i le fa'amatalaina o mataupu a le fanau i lenei foi masina. Ia e fa'amanatu pea e lelei lava ona fa'aauau pea le togiina o suega a tamaiti, ina ia fa'atupu la'ia pea o latou mafaufau e sailiili ma faitau le Tusi Paia. Afai foi ae le talafeagai ma le taimi ona fa'amalamalama lea o fesili, ae ao pepa ona togi lea i so outou taimi avanoa ona aumai lea i le Aso Sa o lumana'i. Ia manuia lau tapenaga mo le suega.

FESILI:

1. O le ā le tulaga o Mose o lo'o aumai i le tala?
2. E fia tausaga o lo'o ta'ua na aumau ai Isaraelu i Aikupito?
3. O le a le ulua'i vavega na faia e Mose i luma o Farao?
4. O le malosi mai fea lea na mafai ai e Mose ona faia vavega?
5. E fia mala o lo'o ta'ua sa fa'ao'o e le Atua ia Aikupito?
6. O ai sa fai ma fofoga o Mose ia Farao?
7. O le a le igoa o le mauga lea sa tu'uina ifo ai e le Atua ia Mose ana tulafono?
8. E fia tausaga sa aumau ai Isaraelu i le vao o Sinai?
9. O ai na ia ta'ita'ia ma fa'ao'oina Isaraelu i le nu'u folafolaina ina ua oti Mose?
10. O le a le uiga o le upu "Naseri"?

Ia fa'ai'u le suega i le pese 370 mai le tatou tusi pese, ma ia fai se tatalo e saunia e se tama.

VAEGA III: O PUAPUAGA O IESU MA LONA MANUMALO.

Aperila 05, 2020

Mataupu 9: “Aso Sa Laupama.”

Tusi Faitau: Mareko 11:1-10

Sini: Ia malamalama atili pea tamaiti i le uiga o le Aso Sa ua ta’ua, “O le Aso Sa Laupama.”

Fesoasoani mo le Faiaga:

Malo lava le sauni fa’afetai le lototele i le galuega. Ia ua tatou o’o i le vaiata o puapuaga o le Alii, e lelei lava ona matuā fa’amamafa i tamaiti le taua ma le uiga o le vaiata lea ua tatou o’o i ai, ina ia tatou lagona fa’atasi, ae taoto atu lava i lau susuga i le fa’apupulaina o le mataupu. Ia manuia tele lau tapenaga.

Fesoasoani mo le Mataupu:

- a. O le malaga lenei a Iesu i Ierusalem ma taunu’u ai valoaga a Perofeta e pei ona valoia foi e Sakaria 9:9. O Lenei malaga o lo’o fa’aalia ai le tulaga fa’a – Mesia o Iesu, auā o lo’o fa’aalia ai le alalaga fiafia ma le talia lelei e tagata.
- e. O le ulua’i malaga lava lea o Iesu i Ierusalem ma na maliu ai lava i Ierusalem. O lona uiga o lana malaga muamua ma le mulimuli.
- i. O le upu “Mesia” e ave i se tagata maua (Tupu). O lona uiga, e ao ona fa’aaloaloga e tagata. Ua iloa o ia lava o le Tupu ona o fa’aaloaloga sa faia ia te ia i le ala e tagata a’o afio mai o ia. (Mareko 11:9-10)
- o. O Iesu lava ia, o le Mesia o le manumalo. O le Ali’i o le filemu, leitioa a alalaga le motu o tagata ma fa’apea ane, “Osana”! Ia manuia le Afio mai i le suafa o le Ali’i. O i latou lava foi na sa toe alalaga ma fa’apea, “Ina fa’asatauro ia” ina ua o’o i Ierusalem.
- u. O fuafuaga Paia a le Atua, o Ierusalem lava e fa’aalia ai le manumalo a’ia’i o Lona Alo, o lona lava nu’u ia fa’aalia ai lona manumalo, a’o lona manumalo e ala i puapuaga na o’o lava i le satauro ma maliu ai, peita’i e le’i gata ai auā sa fa’aalia lona manumalo a’ia’i ina ua toe soifua mai.

Ua fa’aalogaina ma ua fa’aigoaina e le au kerisiano le Aso Sa lenei o le Aso Sa Laupama, auā o le aso lenei sa malaga atu ai Iesu i lona nu’u (Ierusalem) i lana malaga fa’atupu ae tumu ane tagata ma fa’aitualalua i le ala, ua latou fola le ala i lau o le la’au o le pama. O le fa’aogaina o lau o le pama i na ona po o le fa’aaloga o le “manumalo” ma le “filemu”. O lona uiga, o le malaga a Iesu le tupu, o le malaga o le manumalo atoa foi ma le filemu. Ua alu atu nei Iesu se’i avatu le manumalo ma le filemu i lona nu’u, e ui o le manumalo ma le filemu e fanau mai i puapuaga ma tiga.

Sa taunu’u lava, auā sa fa’asatauroina lava ma maliu o ia i Ierusalem, sa toe soifua manumalo mai foi o ia. O lenei la, ua avea pea Ierusalem ma ogatotonugalemu o le fa’aolataga a le Atua mo le lalolagi. O le Aso Sa la o Laupama, o lona uiga, o le aso o le malaga fa’atupu a Iesu e ave

le filemu atoa foi ma le manumalo i Ierusalem; auā o Ierusalem lava ua fa'atinoaina ai, ma taunu'u atoatoa ai, le fa'aolataga a le Atua mo le lalolagi.

Galuega Fa'atino:

Taoto atu lava i lau susuga le Faiaoga le galuega fa'atino, pe fai ni fesili pe leai. Ae manaia foi ae fai sina fa'atinoga pu'upu'u o le tala lea o le malaga fa'a-tupu a Iesu, ina ia lagona atili ai pea e le fanau le tāua o lenei foi vaitau i tausaga ta'itasi.

Pese:

1. Osana pepese tamaiti uma
Tamaiti uma, tamaiti uma
Osana pepese tamaiti uma
Ua Afio mai iesu.
2. Ua latou fola Laupama i le ala
Laupama i le ala, Laupama i le ala
Ua latou fola Laupama i le ala
Ua Afio mai Iesu.
3. Ua ti'eti'e atu Ierusalem
Ierusalem, Ierusalem
Ua ti'eti'e atu Ierusalem i luga o le Asini.

Tatalo: Ia tofi se tama e fa'ai'u le vasega i le tatalo.

Ia manuia tele le Aso Sa!!

.....

Aperila 12, 2020

Mataupu 10: "O IESU MANUMALO" (Aso Sa o le Eseta)

Tusi Faitau: Mataio 28:1-8

Sini: Ia a'oa'o atu ina ia malamalama tamaiti sa manumalo Iesu i lana galuega fa'aola atoa foi ma le oti.

Fesoasoani mo le Faiaoga:

Fa'amalo atu lava le onosa'i i le fa'amatalaina o mataupu a le fanau. Talitonu o lo'o sologa lelei pea le fa'agasolo o le tatou galuega. Ia o le Aso Sa lenei o le toe tu, ua masani ai tamaiti ae lelei lava ona fa'amanino lelei i ai ia nai eseesega laiti o fa'amatalaga a le au fai-Evagelia. Ia manuia le fa'amatalaina o le mataupu.

Fesoasoani mo le mataupu:

E ese'ese fa'amatalaga a le au fai-Evagelia i le Toe Tu.

1. Fai mai Mataio, “O Maria le Makatala ma le isi Maria sa usu i le tu’ugamau ma iloa ua toe tu Iesu.” O Mareko, fai mai, o Maria le Makatala, Maria le tinā o Iakopo ma Salome. O Luka fai mai, o Maria le Makatala, Ioana, Maria le tinā o Iakopo ma isi. O Ioane fai mai, o Maria le Makatala na’o ia sa usu i le tu’ugamau ma iloa ua uma ona fuliese le ma’a i le gutu o le tu’ugamau, ona toe faliu lea ma tamo’e ua ta’u ia Peteru ma le so’o sa alofaina (Ioane). Ona taufetuli mai lea i le tu’ugamau.
2. E ui lava la ina ese’ese le molimau a le au fai-Evagelia i tagata tonu sa ulua’i maua le tala, “ua toe tu le Ali’i” e le taua lena, ae sili ona taua le tasi o la latou molimau, “ua toe tu le Ali’i ma ua manumalo i le oti ma le tu’ugamau.” O le taimi sa o atu ai fafine i le tu’ugamau e fa’apea, ua mavae le Sapati ae ua tafa ata o le ulua’i aso, o lona uiga, pe tusa o le 5:00am aga’i atu i le 6:00am o le isi aso. O le aso fou la lea sa toe tu mai ai Iesu, lea ua avea nei ma Aso Sa o le au kerisiano. O le Aso Sa la fa’a-kerisiano po’o le (Sunday) i le gagana Peretania, “O le Aso lea o le manumalo o Iesu i lana galuega fa’aola ma le oti. O le isi ona fa’auigaina, “O Aso Sa kerisiano”, o le Aso o le malamalama fou ua sulugia ai le lalolagi.
3. E tutusa fa’amatalaga a Mataio ma Mareko i le mafuaaga sa naunau ai fafine e o i le tu’ugamau ma ia usupo a’o le’i malamalama. O le masani lava lea a fafine o Iutaia pe a maliu se tasi e pele i a’i latou, e tatau lava ona o e asi i lona tu’ugamau e u’u lona tino i le u’u manogi, ma ave iai ni teu fugalaau o fa’ailoga o le alofa. Ia ae le gata foi i lea, a’o le toe taimi foi lena ia fuli ai e tagi ma matuā fa’anoanoa.
4. O le mafuaaga o lo’o ta’ua sa usupo ai fafine i le tu’ugamau, manatua foi, o le tu’ugamau o lo’o leoina e fitafita. Sa fuafua lelei lava la e fafine, o le taimi tonu lava lea ua uma ai le malosi o le pupula ma e le taumate ua momoe gase. O le agelu na ia fuli ese le ma’a, o le avefeau o lo’o iai le malosi (power). O le avefeau o le malamalama, o le misionare o le “Tala Lelei”. O lē sa fetalai i fafine, “aua lua te matata’u oulua, auā ua ou iloa ua lua sailia mai Iesu na fa’asatauroina. E lē o i’inei o ia, auā ua toe tu mai o ia.”

Galuega Fa’atino: Ia taina i le pepa pe tusi foi ae tufa i tamaiti.

Toe tusi mai fa’amatalaga a le au fai-Evagelia nei e pei ona fa’amatalaina.

Mataio:

Mareko:

Luka:

Ioane:

Ia usu le pese e 51 o lo’o i le tusi pese, ma ia tofi se tama e fai le tatalo e fa’auma ai le vasega.

Ia manuia tele le Aso Sa.

Aperila 19, 2020

Mataupu 11: “O SO’O E TO’ALUA I LE ALA I EMAU.”

Tusi Faitau: Luka 24:13-35

Sini: Ia a’oa’o atu ina ia iloa e tamaiti ona tatalo i le Atua ina ia foa’i mai le mataala e iloa ai fa’aaliga o mea lelei ua tutupu ma o le a tutupu.

Fesoasoani mo Faiaoga:

Malo lava le su’esu’e e tusa ai o mataupu a le fanau, o le tusi faitau lava le malosiaga e mafai ma telē le fesoasoani i le fa’amatalaina o le mataupu, e tatau ai lava ona lava le taimi e Mafuta ma faitau ai. Ia manuia lau tapenaga.

Sina Fesoasoani mo le Mataupu:

1. O le aso lava lea ua toe tu ai Iesu na toe foi ai isi so’o e to’alua i lo la nu’u ua igoa o Emau. Ua ala ona foi nei so’o i o la aiga ona ua leai so la fa’amoemoe, auā sa fa’amoemoe ia Iesu, a’o lo la manatu o Iesu lea ua maliu e le toe foi mai. Ua foi nei i o la aiga e su’e nisi la galuega e ola ai. A’o savavali la le au ali’i i le ala, sa o ma talanoa i le mea ua tupu ia Iesu, ma o la mata fa’anoanoa.
2. Sa fa’atasi atu i ai Iesu ma to’atolu ai la latou solo. Ona fesilisili lea i ai o Iesu po’o le a le la mataupu o lo’o talanoa? Ona fa’amatala lea e i laua ia Iesu mea uma sa tutupu i Ierusalem ma lo la leiloa o Iesu lava lea ua latou o fa’atasi.
3. Sa fa’amatala loa iai e Iesu tala uma lava o lo’o tusia e uiga ia te ia e amata mai lava ia Mose ma le au perofeta, ma fai atu, “tagata valea ma loto faigata, e le tatau ea ona tiga o le Keriso, ona o’o ai lea i lona mamalu.”
4. Sa o pea le savaliga ma ua o’o i Emau i aiga o so’o nei e to’alua, ma ua vaai atu i laua, o le a alu loa Iesu, ona la augani atu lea i ai latou te malolo ma momoe auā ua lata mai le po. Sa talia e Iesu lo la mana’o ma latou ulufale loa ma i laua. Ina ua sauni e a’ai, ona tago ai lea o Iesu i le areto, ua fa’afetai ma avatu i a’i laua. Ona fa’atoā iloa ai lea e i laua o Iesu lava lea ua latou fa’atasi, a’o Iesu ua mou ese o ia.
5. Sa fetautalatalaa’i so’o i a’i laua lava ma fa’apea a la tala ma le ofo tele. “E le’i mu ea o ta loto ia te’i ta’ua ina ua fetalai o Ia ia te’i ta’ua i le ala, ina ua fa’amatala mai foi e ia o Tusi ia te’i taua?” I lenei lava taimi o le po, sa la toe fa’anatinati loa ma toe foi atu i Ierusalem e ta’u atu lenei tala fiafia.
Ioe le fanau, ua aumai moi tatou se a’oa’oga taua o lenei tala, aua tatou te fiu gofie, aua le fa’avaivai, aua foi ne’i mate lou fa’amoemoe auā o lo’o soifua le Ali’i (Iesu) mai ananafi o le asō, ma e o’o i le fa’avavau.

Galuega Fa’atino: Tali i le Sa’o po’o le Sese

1. O le fa’amoemoe ma fa’alagolago i le Atua e mafai ai ona tatou tete’e le fili. (Sa’o / Sese)

2. Ua ala ona foi so'o e to'alua i o la aiga ona ua leai so la fa'amoemoe. (Sa'o / Sese)
3. E le'i fa'atasi Iesu ma so'o e to'alua i le ala i Emau. (Sa'o / Sese)
4. Sa talia e Iesu lo la mana'o ma latou ulufale loa ma i laua. (Sa'o / Sese)
5. E uma lava le tala e le'i iloa lava e le au so'o o Iesu o lo'o latou fa'atasi. (Sa'o / Sese)

Pese: Ua ou filifili e mulimuli ia Iesu
 Ua ou filifili e mulimuli ia Iesu
 Ou te le toe foi, ou te le toe foi
 Le satauro i ou luma, le lalolagi i ou tua
 Ou te le toe foi x2.

Tatalo: Ia fa'amasani pea tamaiti e tatalo, tofi se tama'ita'i.

Manuia le Aso Sa!!



Aperila 26, 2020
Suega Tolu

Fesili:

1. O le malaga fa'afia o Iesu i Ierusalema lea na malii ai?
2. O le a le ituaiga manu lea sa ti'eti'e ai Iesu? E telē pe laititi?
3. O le a se manatu i na ona po e tusa ai ma le fa'aogaina e tagata o lau o pama?
4. Ta'u mai po'o fea le vaega o le lalolagi o lo'o iai Ierusalema?
5. O le a tonu le aso lea sa usupo ai fafine e asi le tu'ugamau?
6. O le a le feau na ta'u e le agelu i fafine ia ta'u atu i so'o o Iesu?
7. O ai le igoa o le aai lea na fa'ailoa i le au so'o latou te feiloa'i ai ma Iesu?
8. Sa fa'aapefea ona iloa e so'o e to'alua lea sa o i Emau o Iesu lea sa latou talanoa?
9. Aisea na o ai ia so'o i Emau?
10. O le a se a'oa'oga ua e maua mai i mataupu o lenei Masina?

Pule lava tou susuga i Faiaoga pe toe fa'aopopo nisi fesili. Ma ia saunia se pese e fa'auma ai le suega, ona fa'ai'u lea i se tatalo. Ia manuia le suega o lenei Masina.

VAEGA 1V: SUFI LE OLA FA'ATUATUA

Me 03, 2020

Mataupu 11: “E LE'I TU'ULAFOA'IA E IESU LONA AU SO'O.”

Tusi Faitau: Luka 24:36-53

Sini: Ia iloa ma malamalama tamaiti, e le'i tuua e Iesu ona so'o ina ia nonofo ma le masalosalo, ina ne'i mate lo latou fa'amoemoe.

Fesoasoani mo le Faiagoa:

Malo lava le onosa'i ma le fa'apalepale, o la le Aposetolo o Paulo...e le se mea fa'alēaoga lo outou tautigā i le galuega...Ia o lo'o tatou iai pea i lenei vaiatau o le toe tu, ma o lo'o fa'agasolo atu ai lava a tatou mataupu o lenei foi Masina. Ia manuia tele lau tapenaga.

Fesoasoani mo le Mataupu:

I le fuaiupu e 36-43, O lo'o ta'ua ai sa fa'aali Iesu ia Peteru ma so'o e to'asefulu, o lona uiga o le fa'aali muamua lea o Iesu i ona so'o e to'a sefulu ma le tasi talu ona toe tu mai i le tu'ugamau. Fai mai a'o talatalanoa le au so'o ma le lē mautonu i tala pei ona ta'ua mai e fafine sa o i le tu'ugamau, atoa foi ma le molimau a so'o e to'alua sa o i Emau. Sa tumu i latou i le fefefe, ma sa latou manatu atonu o se temoni (aitu) ae le o se Iesu e tino mai e pei o latou, e iai ivi, pa'u ma a'ano. Ua latou manatunatu fa'apena auā e le'i talitonu latou e tupu se mea fa'apea o le toe tu mai o se tasi i le tino moni e pei ona i ai a'o soifua.

A'o talatalanoa ma manatunatu fa'apena le au so'o, sa fa'ate'ia ina ua tu mai Iesu i o latou luma, ona atili ai lava lea ona fefefe ma matata'u auā ua fa'apea i latou o se agaga lea ua tino mai ia Iesu. Sa fa'aali atu e Iesu i a'i latou ona lima ma ona vae sa tutu'i i fao ina ia talitonu ai ma aveese ai le fefe ma le masalosalo vale i o latou loto. Sa fa'atalitonuina atili e Iesu ona so'o o ia lava lea ina ua taumafa ma inu i o latou luma.

I le fuaiupu e 44-49, E peiseai ua toe fa'amanatu atu ai e Iesu i ona so'o mea uma sa ia ta'u atu i a'i latou, o mea uma o lo'o tusia i le Tulafono a Mose ma le au perofeta, e tatau lava ona taunu'u. Sa ia toe fa'amanatu foi upu tusia i tusi ua fa'apea, “e fa'apea foi ona tatau ona tigā o le Keriso, ma toe tu nai e ua oti i le aso tolu”, ina ia tala'iina le salamō ma le fa'amagaloina o agasala i nu'u uma i lona igoa, ae amata mai i Ierusalem. Ua ta'u manino atu foi e Iesu i ona so'o, o outou o molimau i mea uma ua outou iloa ma vaai i ai ma ua fa'alogi ai, o outou foi e tala'iina le salamō ma le fa'amagaloina o agasala i le igoa o Iesu i nu'u uma.

Fuaiupu e 49, Ua folafola atu foi e Iesu o le a foa'iina mai le Mana (Agaga Paia) e fai ma ta'ita'i tama i a'i latou.

O le uiga o nei mea uma e pei ona fa'aali atu e Iesu i ona so'o ina ia aua ne'i mate lo latou fa'atuatua, a ia toe fa'amūmū le loto tele ma le talitonu ua manumalo Iesu i le tu'ugamau ma le oti, a'o le Mana o le a foa'iina mai e pei ona folafola e Iesu i ona so'o, o le malosi lena latou te mafaia ai so'o se mea faigata, ia fa'atali ma le fa'atuatua se'i auina ifo le Agaga Paia ona latou o lea e fa'aauau le galuega ua tu'uina i a'i latou.

Galuega Fa'atino:

Ia tusi mai ia lima ni fuaiupu e fa'amatala ai po'o le a le galuega a le Agaga Paia mo i tatou.

Pese: Ia usu le pese e 114 o lo'o i le tatou tusi pese.

Tatalo: Iesu lo matou fa'aola, ua matou fa'afetai ona o le Tusi Paia e matou te faitau ma malamalama ai i upu o le ola, fa'afetai i lou Agaga Paia, o lo'o fesoasoani pea ma lavea'ina i matou mai fa'aososoga o lenei lalolagi, ona o Iesu, Amene.

Ia ta'u pea i tamaiti le tusi faitau o le Aso Sa o lumana'i, ua lava lena galuega e fai i le fale.

Ia manuia le Aso Sa!!

.....

Me 10, 2020

Mataupu: "O RA'AVA LE TINA NA LILIUINA LONA LALOLAGI ONA O LONA FA'ATUATUA." (Aso Sa o Tinā)

Tusi Faitau: Iosua 2:1-24

Sini: Ia iloa e tamaiti, na fa'aolaina le Tinā ma liliuina lona olaga leaga ona ua fa'atuatua ma talitonu i le Atua.

Talu ai o le Aso Sa fa'apitoa lenei mo tinā. E avea ai lenei avanoa, e fa'amanuia atu ai lo tatou ofisa nei, i le tinā o le galuega ma tinā uma o lo'o gapatia i le galuega fa'a-faiaoga Aso Sa, aemaise o tinā uma o le aulotu. Malo le galulue, fa'afetai fai o le faiva. E moni lava e au pea le ina'ilau a tinā. Ia fa'amanuia atu le Atua i o outou faiva alofilima, ma ia maloloina i le tino ma le agaga, auā feau ma tiute ua valaauina iai lo outou soifua. Alofaaga ma fa'amanuiga mai le Fa'atonu ma le Ofisa o A'oa'oga Kerisiano. Manuia tele le Aso Sa o tinā. Soifua.

Fesoasoani mo le Faiaoga:

Fa'amalo atu lava le su'esu'e ma le tapenapena mo mataupu a le fanau. Ia talu ai o le Aso Sa lenei o tinā, manaia foi ae amata i nai fesili e fai i tamaiti po'o a uiga o latou tinā e vāai iai i aso uma, ona fa'amatala loa lea o le tala ia Ra'ava. Pe a tusa ai ma lou finagalo. Ia manuia lau tapenaga mo le mataupu.

Sina Fesoasoani mo le Mataupu:

O le tala o lenei Aso Sa tamaiti, o le tala i le fafine talitane (prostitute) e igoa ia Ra'ava, na fa'aolaina ma avea ma tinā o le aiga na tupuga mai ai le Fa'aola (Mesia) ona ua suia e ia lona lalolagi leaga ma ua avea ma tinā fa'atuatua ma talitonu i le Atua.

Ina ua auina e Iosua ana auauna e o i le aai lenei o Ieriko e siaki pe va'avaai i se auala e faigofie ai ona latou osofa'ia ma fa'aumatia le nu'u, sa ulu atu auauna a Iosua i le faitoto'a ma tali lelei e le fafine lenei o Ra'ava, sa ia ave i lona fale ma fa'alalafi ai auā ua a'ami mai e auauna a le tupu ua fa'apea mai ia Ra'ava ina ia tu'uina atu tagata nei ina ia fasiotia.

Sa pepelo Ra'ava i auauna a le tupu atoa foi ma le tupu, ua ia fa'apea atu, o tagata na o mai ua leva ona la tuua lo'u fale ma ua o ese. Ae na fa'alalafi e Ra'ava i lona fale ona ua fa'atuatua o ia i le Atua, e tu'uina atu lava e le Atua le a'ai atoa ma sã Kananã i lima o Israelu.

Ua iloa le fa'atuatua o Ra'ava i le Atua, auã ua na o mea na ia fa'alogo iai ua faia e ia i lona nu'u, ona mata'u lea o ia ma ua ia le tu'uina atu ai auauna a Iosua ina ia fasiotia. Ua iloa foi le fa'atuatua o Ra'ava i lana ta'utinoga sa fai i auauna fai mai a ia, "ua matou fa'alogo i mea na faia e le Atua ia te outou, ona liusuavai ai lea o matou loto, ua le toe iai lava se malosi i se tagata ona o outou, auã o le Ali'i lo outou Atua o le Ali'i ia i le lagi i luga ma le lalolagi i lalo nei."

Sa fa'atoga Ra'ava i auauna a Iosua ina ia la tauto mai e le fa'aumatia o ia atoa ma lona aiga pe a o'o ina latou osofa'ia le a'ai, ona o lona agalelei i a'i laua. Sa fa'apea foi ona ta'utino atu auauna a Iosua ia Ra'ava, ua fa'apea atu, afai lava e te fa'amaoni ma e le ta'ua le ma savali i le tupu, o le a fa'apea foi ona fa'aolaina o ia ma lona aiga. Sa fa'atonu atu auauna a Iosua ia Ra'ava ua fa'apea atu, "ia e sisiina le fu'a mūmū i le fa'amalama o lou fale i le aso matou te osofaia mai ai le a'ai, o oe ma lou aiga uma ia fa'apotopoto i lou fale, e fai le fu'a ma fa'ailoga matou te le fa'aumatiaina pe osofaia lou aiga. Ona tu'u ifo lea e Ra'ava auauna a Iosua i le fa'amalama o lona fale i le po ma o ai i laua ma le manuia.

O le i'uga tamaiti, sa fa'asaoina e Iosua ma le fanauga a Israelu le ola o Ra'ava ma lona aiga uma i le aso na latou osofa'ia ai Ieriko ma fa'aumatia tagata sa nonofo ai. O le i'uga foi o Ra'ava o lo'o ta'ua i le Tusi Paia sa avea o ia ma tinã fa'atuatua ma ua fa'amagaloina e le Atua ana agasala. Sa avea foi lenei fafine o Ra'ava ma tinã o le aiga sa fanau mai ai le Fa'aola (Iesu). [Mataio 1:1-5]

Tamaiti, e le'i vaai lava Ra'ava i ni vavega sa faia e le Atua ia Israelu, na o lona fa'alogo lava a ua tupu ai lona fa'atuatua, ma silafia e le Atua lona loto ma fa'amagaloina ana agasala, na suia ai e ia lona lalolagi tuai e avea ma lalolagi fou.

Galuega Fa'atino: O le avanoa lelei lea e fai ai le tusiga solo e fa'atatau i tinã, afai lava e pu'upu'u le taimi ona ave lea e fa'auma i le fale ona siaki lea i le Aso Sa o lumana'i.

Pese: O se tinã amio lelei, e sili i peninã,
E silisili o ia i ma'a tãua
Ua fa'apenã, o oe tinã
I o matou nei agaga.

Tali: Fa'afetai, i le Atua le Tamã
Mo se tinã lelei ua ia foa'ia
I totonū, o lo matou nei aigã,
Ua fai o ia ma malamalama i le pogisã.

Tatalo: Ia saunia e lau susuga se tatalo e fa'ai'u ai le vasega.

Ia manuia tele le Aso Sa o Tinã!!

Me 17, 2020

Mataupu 12: “UA TU’UINA ATU IA PETERU LE GALUEGA.”

Tusi Faitau: Ioane 21:15-19

Sini: Ia a’oa’o tamaiti ina ia malamalama i le galuega ua tu’uina e Iesu ia Peteru atoa foi ma lana matāfaioi po’o ona tiute e tatau ona fai.

Fesoasoani mo le Faiaoga:

Fa’amalo atu lava le onosa’i i tiute ma faiva o le vaiaso, ia o le tauogologo lava ina ia fa’atupu pea manatu auā le galuega. Ia matuā saunia pea lau susuga i le Faiaoga e tusa ai o le fa’amatalaina o le mataupu, e lelei lava ae fa’aoga pea le gagana faigofie e malamalama ai le fanau. Ia manuia tele lau tapenaga.

Fesoasoani mo le Mataupu:

A’o fai le faiva o le au so’o o Iesu i le vai i Tiperia, sa fa’aali Iesu i a’i latou, ma o lona fa’aali fa’atolu lea i ona so’o talu ona toe tu mai i le tu’ugamau. Ina ua malama a’e le taeao sa iloa atu e Peteru ma isi o le au so’o le tagata o lo’o tu mai i le auvai, ae sa latou leiloa po’o ai.

Sa valaau Iesu ma fa’apea atu i le au so’o, “Le fanau e, pe i ai ea ni a outou mea’ai?” Ua tali mai le au so’o, “e leai”. Ona fetalai atu lea o Iesu, ia lafo le upega i le itu taumatau o le vaa. Ona latou lafo ai lea ma ua maua ai i’a ua tumu ai le upega.

E taunu’u mai so’o i uta ua uma ona saunia e Iesu le mea’ai, o i’a tunu ma areto, sa fai ai loa la latou mea’ai, ae le’i fesili lava so’o po’o ai ia, auā ua latou iloa o Iesu lava lea ua latou fa’atasi. Ina ua uma ona latou a’ai, sa fesiligia fa’atolu ai e Iesu Peteru, “Pe moni lona alofa ia te ia?” E fa’atolu foi ona tali mai Peteru, “Ioe, ua e silafia lava le Ali’i e, ou te alofa ia te oe.”

Ona fetalai atu lea o le Ali’i ia Peteru, Ia e fafaga i a’u tama’i mamoe, ia e leoleo i a’u mamoe, ia e fafaga i a’u mamoe.” Tamaiti, o le uiga o le fetalaiga a Iesu ia Peteru, o Peteru ua tu’uina i ai lana galuega e pei ona ia faia a’o soifua, o le galuega, ia tala’iina le malo o le Atua atoa ma le tala i le fa’aolataga sa saunia e Iesu.

O tiute la ma matafaioi a Peteru e tatau ona fai, lea ua uma ona ta’u atu e Iesu...**Fafaga mamoe...Leoleo mamoe...Tausi mamoe.**

O tiute uma foi ia sa iloa i le soifua o Iesu, auā sa ia fafaga le motu o tagata i mea’ai fa’a-le-tino atoa ma le agaga, sa fa’amalolo i e mama’i i le tino, atoa ma e mama’i i la le agaga. Ua o’o lava ina maliu ona o lona alofa ia ola le tagata. Ua sauni nei o ia e afio i lona tamā, a ua toe fa’aali lava i ona so’o, se’i tu’u atu le galuega fa’atasi ai ma tiute ma matafaioi ia Peteru na te faia ma fa’aaauina.

Tamaiti, ua tatou iloa foi le tala i le galuega a Peteru, e tolu afe sa liua i lana lauga i le aso Penetekoso. O ia foi o le ta’ita’i o le au so’o. O Peteru lava foi o le poutu po’o le malosi sa tala’iina le tala lelei ma o’o ai ina amataina le Ekalesia. Sa matuā atoatoa le soifua auauna o Peteru auā sa maliu fa’a-maturo lava ia, ona o le talalelei ia Iesu ma lana fa’aolataga.

Galuega Fa’atino:

1. Ia tusi mai fetalaiga e tolu a Iesu na tali ai ia Peteru.

2. Fa'amatala mai le uiga o le maliu fa'a-maturo.

Pese: Le leoleo mamoe lelei
Ia e alofā i a'u mamoe,
E te ta'ita'i i le vaomu'a
E feinu i vaitafe lemu.

Tali: E ui lava ina ou savali
I le vanu o le oti,
E te saili mai, ma fa'aola ia te a'u.

Tatalo: Ia saunia e se tama le tatalo e fa'ai'u ai le vasega.

Ia manuia le Aso Sa!!

Me 24, 2020

Mataupu: Suega

Sini: O le toe fa'amanatu ma su'esu'e mafaufau o le fanau ina ia fa'aosofia pea o latou lagona e finau ai ma taofi tala ua a'oa'oina ai i latou.

Fesoasoani mo le Faiaoga:

E lelei lava pe a taina fesili i pepa ma fai ni kopi ia tofu le tamaititi ma le kopi o fesili. E pule lava lau susuga i le Faiaoga i le faiga o fesili e fua lava i le malosia ua o'o i ai tamaiti, pe fa'aoga foi fesili ua tu'uina atu. Ia manuia lau tapenaga.

FESILI:

1. O le a le folafolaga na fai e Iesu i lona au so'o?
2. O le a le mafaufau na o'o i le au so'o ina ua fa'aali i ai Iesu?
3. O le fa'afia lea ona fa'aali Iesu i lona au so'o e tusa ai ma le tala?
4. O le a se mea lelei sa faia e Ra'ava na fa'asaoina ai o ia ma lona aiga?
5. O fea sa nofo ai Ra'ava?
6. O le a se a'oa'oga ua tatou maua mai i le tala ia Ra'ava?
7. O le a le galuega lea ua tu'uina ia Peteru?
8. O le a le uiga na fesili fa'atolu ai Iesu ia Peteru pe alofa ia te ia?
9. Ta'u mai tiute ua fa'atonuina ai e Iesu Peteru ina ia faia?

Ia saunia se pese ma fai se tatalo e fa'ai'u ai le suega.

Me 31, 2020

Mataupu 13: “E LASI AUALA O LO’O GALUE AI LE AGAGA I TOTONU I A’I TATOU.”
(ASO SA PENETEKOSO)

Tusi Faitau: Galuega 16:6-10, 1 Korinito 12:4-5, Efeso 4:1-16

Sini: Ia iloa e tamaiti, e matuā tele galuega a le Agaga Paia o lo’o galueaina lo tatou ola.

Fesoasoani mo le Faiaoga:

Malo lava le su’esu’e i mataupu a le fanau. Talu ai o le Aso Sa lenei o le Penetekoso e tatau lava ona matuā fa’amamafa le fa’amatalaina o le mataupu. Afai lava e pu’upu’u le taimi aua le faitauina uma tusi faitau ua tusia i luga, ae fa’amatala sa’o le fesoasoani ua tu’uina atu, o le mataupu lava lenā o le asō. Ia manuia lau galuega.

Fesoasoani mo le Mataupu:

Fai mai le Aposetolo o Paulo e fitu auala o lo’o galue ai le Agaga Paia i o tatou tagata lilo.

1. “UA SAUNIA E LE AGAGA PAIA O TATOU LOTO MO LE ULUFALE ATU I LE OLA FOU IA KERISO.”

E matuā talitonu Paulo, o le galuega a le Agaga Paia sa ta’ita’iina ma leoleoina lona ola mai lava i le taimi a’o le’i fa’alogo o ia i le suafa o Iesu Keriso. Ua talitonu Paulo, o le Atua sa filifilia o ia a’o le’i fanau mai, ma na valaauina o ia i lona alofa tunoa, na finagalo o ia ina ia fa’aali mai lona alo i totonu ia te ia.

Manatu Paulo, o le aoao o le foafoaga a le Atua, ua aofia ai ma ia, o lo’o naunau atu i le fia fa’aatoatoaina, o lo’o fa’atalitali atu ma le naunau i le fa’aalia mai o atali’i o le Atua (Roma 8:19-25). O lea fa’anaunauga ua mafua ona o le galuega a le Agaga Paia. O loto ua le maua se mapusaga ma le galala i le fia inu i le Ali’i, o fa’ailoga na o le Agaga Paia o lo’o saili mai ia avatu le tagata i le ola fou ia Keriso.

2. “O LE AGAGA PAIA UA NA TOE FOAFOAINA MA FA’AFUINA I TATOU.”

Fai mai Paulo, e le mafai e se tasi ona ta’ua Iesu o lona Ali’i, se ia vagana ua galueaina lona loto e le Agaga Paia. (1Korinito 12:3)

Ona o le galuega a le Agaga Paia ua mafai ai ona tatou talitonu ma iloa ua fa’aali mai le Atua e ala ia Iesu. Ina ua tatou iloa o ia, ona lagona ai lea o le tatou fa’atauva’a ma le gaogao, ma ta’ita’iina atu ai i tatou i galuega a le Agaga Paia. O i na tatou te iloa ai ua ufitia i tatou e le Atua ua sasa’a atoa mai i o tatou loto, e ala i galuega a le Agaga Paia ua foa’ina mai i a’i tatou. (Roma 5:5)

3. “O LE AGAGA PAIA UA FA’AILOGAINA MA FA’AMAUFU’AILOGAINA LE UIGA MONI O LE ATUA I O TATOU LOTO.”

le Atua ua ia tu’u le fa’amaufa’ailoga i a’i tatou, ma ua foa’ina mai le fa’amaoni o le Agaga i o tatou loto. O lenei manatu, ua fa’amatalaina ai lagona, po’o manaoga o le Atua, ina ia utufia i

tatou i lona natura (nature) ina ia tatou lagona o ia e ana i tatou, ina ua uma ona ia fa'amaufa'ailogaina i tatou.

4. “O LE AGAGA PAIA UA IA FA'ATUPU LE FUA O LE OLA SAILI I LE ATUA.”

O fua o le agaga o le alofa, olioli, filemu, onosa'i, mata-alofa, agalelei, fa'amaoni, ect. (Kalatia 5:22-25).

E ioeina le moni o le manatu ua ta'ua i luga pe a tatou va'ava'ai i le manatu o Paulo, i le ese'esega o galuega a le tino (work of the flesh) ma fua o le agaga (fruit of the spirit). O galuega o le tino, ua fa'aalia mai le olaga o i latou ua le taliaina le Agaga Paia. O le ola i le tino, e fua mai ai le lē usita'i i le Atua ma lē taliaina ai le Agaga Paia.

O le ola i le agaga, e tupu ai le alofa, fa'amaoni, e tupu ai foi le fealofani i le va ma isi ou uso-a-tagata. O galuega a le Agaga e fa'aalia ai le fua o le ola fa'a-le-Atua i olaga o i latou o lo'o valaauina lea lava Agaga. O le a faigofie ai ma olaola le soifua so'ofa'atasi. O le tatou feso'ota'i atu la i le Agaga, o le ki lea e mafai ai ona ola so'ofa'atasi.

5. “O LE AGAGA PAIA UA FOA'INA MEAALOFA UA UNA'IAINA LE KERISIANO IA FA'AOGAINA O IA I LE GALUEGA A LE ATUA.”

E ese'ese meaalofofa ua tufaina mai e le Agaga i tagata ta'ito'atasi, latou te fai ai le galuega a auuina ia atia'e le tino o Keriso, se ia o'o atu i le loto gatasi i le fa'atuatua ma le iloa lelei o le Alo o le Atua, ina ia fai ma tagata matua, ia o'o i le fua o le ua matua, e tatau ma le tumu o Keriso. (Efeso 4:12-13)

6. “O LE AGAGA PAIA UA NA TA'ITA'I I TATOU I LE GALUEGA A LE ATUA.”

Sa ui ane Paulo i lana malaga fa'amisionare lona lua Ferukia ma Kalatia, a ua vaoia e le Agaga Paia aua latou te tautala i le upu i Asia. Ua o'o foi i Mesia ona taumafai ai lea e i latou ona o atu i Pitunia a ua le mafai le Agaga ona latou o. (Galuega 16:6-10)

galuega a le Agaga Paia sa na ta'ita'i ma musuia le faiga malaga. O le Agaga ua ia le tu'uina le tagata ia faigata sana filifiliga. O le Agaga Paia ua tatou va'ava'ai atu ai i le fa'atuatua, o la tatou tali atu lea. Ua ta'ita'iina i tatou e le Agaga, o lea e ao ai ina fa'avaivaia loto uma, a ia tatala atu, ia ususita'i, ma sauni e fa'ataunu'u, po'o fea lava e fa'amasinoina i ai i tatou e le Agaga. “Auā o i latou uma ua ta'ita'ina e le Agaga, o atali'i i latou o le Atua. (Roma 8:14)

7. “UA FESOASOANI MAI LE AGAGA PAIA I A TATOU TATALO.”

I taimi tatou te le mautonu ma vaivai ai, ua leai ni upu, ua leai se agaga tatalo. Fai mai le Aposetolo, “E fa'apea foi ona fesoasoani mai le Agaga i lo tatou vaivai, auā tatou te le iloa mea tatou te ole atu ai ma le tusa, ae peita'i, o le agaga e fautua o ia mo i tatou i le oi e lē mafai ona fa'amatalaina. A'o le su'esu'e i loto, ua silafia e ia le Finagalo o le Agaga, auā o lo'o fautua o ia mo le au paia, e tusa ma le finagalo o le Atua. (Roma 8:26-27)

le Agaga o lo tatou ta'ita'i lilo ma le puna o lo tatou malosi, e o'o mai i taimi tatou te vaivai ai, Ina ua tatou le iloa se upu ma ua leai se malosi o i tatou, o le Agaga na te ta'ita'i i tatou i le Atua, o lē na faia i tatou ia te ia foi le Agaga.

Galuega Fa'atino: Pule lava tou susuga i Faiaoga, ae lelei foi ae ave le galuega e fai mai i le fale, ia fa'amatala mai e tamaiti po'o le a so latou foi malamalama ua iai i le Aso ua ta'ua o le Aso Penetekoso, e tusa ai o le mataupu sa fa'amatalaina.

Pese: Galue lou agaga ia te a'u
Galue lou agaga ia te oe
E sisiva o'u vae, e vivi'i lo'u loto,
Lo'u gutu ua pese i ou viiga, i ou viiga.

Tatalo: Fa'afetai tele le Ali'i e, ona o lou mafutaina pea o i matou e ala i lou Agaga Paia, e fa'amalosia ai pea lo matou ola i aso uma, fa'afetai Iesu...Amene.

Ia manuia le Aso Sa!!

VAEGA V: E LE TU'ULAFOA'IA E LE ATUA ONA TAGATA

Iuni 07, 2020

Mataupu 14: "UA SAILI MAI LE ATUA I LE TAGATA E ALA I LONA ALO."

Tusi Faitau: Ioane 10:10-18

Sini: Ia malamalama tamaiti e lē Finagalo le Atua ina ia fano se tasi i le agasala, a ua ia foa'ina mai lona lava Alo ina ia fa'aolaina tagata uma ma o'o uma i le ola e fa'avavau.

Fesoasoani mo le Faiaoga:

Malo lava le saili, e fa'amoemoe atu lava o lo'o faigofie ona fa'amalamalama matupu ina ua lava tapena le iloa o tou susuga i Faiaoga i fesoasoani ua tu'uina atu. Ia manuia tele le tapenaga mo le mataupu.

Sina fesoasoani mo le Mataupu:

Afai ua fetalai Iesu o ia o le faitoto'a i le malo o le lagi, a le ui atu se tasi ia te ia, e le o'o i le ola e fa'avavau, o le a lona uiga? Ioe ua silafia lava e Iesu o ia lava, ua ala mai ia te ia le fa'aolataga a lona tamā mo le lalolagi, o lona uiga e tataui i tagata uma ona usiusita'i ma talia ana a'oa'oga, ma ola e pei ona ia faia foi le fa'ata'ita'iga

I le fuaiupu e 10: Fai mai Iesu ua ou sau ina ia latou maua le ola ma ia maua atili ai lava, o le a lona uiga?

Ioe, afai ua oti le tagata paia sa foafoaina e le Atua i le amataga ona o le agasala, a lea ua saili mai le Atua i Lona alofa e fa'avavau ina ia toe avatu le tagata i le mafutaga sa ia te Ia ma le tagata i le amataga e paia ma mama, ioe; ua saili mai e ala i le soifua ma le ola o lona lava Alo e to'atasi, auā o le mea lea na afio mai ai o Ia (Iesu) i le lalolagi ina ia fa'aolaina le tagata agasala. A lea sa fa'atinoina ina ua maliu i le satauro ma ua toe soifua manumalo o Ia e fa'avavau.

O ia fetalaiga uma a le Ali'i ua fa'ataunu'uina ma fa'aalia, ma ua fa'aatoatoaina ai le galuega saili mai a le Atua ina ia fa'aolaina le tagata, i le maliu ma le toe soifua manumalo mai o lona Alo. E moni lava lana fetalaiga; f. 17-18: "Auā ou te tu'uina atu lo'u ola, ina ia ou toe aumai ai." "O'i ia te a'u le pule e tu'uina atu, o i ia te a'u foi le pule e toe aumai ai."

A'oa'oga:

1. Ua uma ona saunia e le Atua le fa'aolataga mo le lalolagi uma, e ala lea i le maliu ma le toe soifua mai o Lona Alo.
2. O Iesu lava o le faitoto'a i le ola e fa'avavau.
3. O i latou uma lava e talia Iesu i o latou ola, e mautinoa ua latou maua le ola ma e o'o atu foi i latou i le ola e fa'avavau.
4. E leai se tatou galuega e toe fai mo lo tatou fa'aolaina, auā ua uma ona faia e Iesu le galuega, pau le mea tatou te faia, na ona tatou savavali sa'o i le faitoto'a ma ui atu ai.

Galuega Fa'itino: Fa'atumu avanoa nei o fuaiupu o lo'o i le tusi faitau.

O le gaioi, e leai se tasi mea e sau ai na ona ia gaioi, ma _____, ma _____, ua ou sau _____, ia _____. O le mea lea e _____ mai ai le _____ ia te a'u, auā ou te _____ atu lo'u _____, ina ia ou toe au mai ai.

Pese: #73

Tatalo: Fa'afetai tele le Atua i lou alofa, e ui lava o matou o le fanau agasala, ae e te saili mai lava e ala ia Iesu, ona o lou manatu alofa i a'i matou lau fanau, o le matou tatalo lea e ala ia Iesu lou Alo, Amene.

Ia mauia le Aso Sa!!

.....

Iuni 14, 2020

Mataupu 15: "O LE ALOFA FA'A-LE-ATUA E TUTUSA AI TAGATA UMA."

Tusi Faitau: Luka 15:1-7

Sini: Ia iloa e tamaiti e le alofa fa'apito le Atua na o e amiotonu, ae alofa foi i le tagata agasala, na te le tu'ua le tagata agasala ina ia agasala pea, ae saili mai pea o ia ina ia avatu le tagata agasala ina ia fa'aolaina.

Fesoasoani mo le Faisiaoga:

Fa'afetai le su'esu'e i mataupu a le fanau, o lo'o iai lava foi le faitauga o lenei Masina ma e ao lava ona taula'i pea i ai le fa'amatalaina o mataupu, ma ia o gatasi ma le fesoasoani ua tu'uina atu. Ia mauia le fa'amatalaina o le mataupu.

Fesoasoani mo le Mataupu:

1. O le au Faresaio, o i latou ia e popoto tele i le tulafono, o le manatu o le au sinopi fa'apea foi se manatu o le Tusi o Galuega e fa'apea, "O le au Faresaio" o le vasega ua na'o tagata popoto ma atamamai i le tulafono po'o faia'oga o le tulafono. O le au faresaio o tagata latou te tausi tele i upu mai anamua aemaise o tulafono fa'a-Iutaia anamua (Mareko 7:5). E foliga mai o le au faresaio i lo latou lava manatu, o i latou o pule i le tulafono. O le manatu o le au faresaio ma le au Tusi upu, ua na o latou lava tagata fa'amaoni. O tagata ao lafoga i manatu o le au Faresaio ma le au Tusi upu, o tagata agasala, auā o lo'o latou aoina tupe (tax) mai tagata, o lona uiga o lo'o maua foi e latou le avanoa e tu'u ai le isi vaega i lana taga.
2. O le uiga o le fa'ataoto a Iesu e fa'atautu tonu lava lenei fa'ataoto i manatu ua silafia e Iesu o lo'o i loto o le au Faresaio ma le au Tusi upu. Auā ua manatu lava latou e tatau ona sau Iesu e latou te talatalanoa ma fa'alatalata mai i a'i latou auā o latou o tagata amiotonu. Auā o le latou masani lea ma aga fa'a- Faresaio, "e le fia latalata i tagata ao lafoga po'o ni tagata foi ua latou manatu o tagata agasala, e le mafai foi ona latou a'ai fa'atasi. O le ala lena sa muimui ai.
3. O lenei Fa'ataoto ua fa'atautu i tagata agasala, e pei ona manatu le au faresaio o tagata agasala i latou. O le manatu o Iesu e sili ona naunau alofa le finagalo o lona tamā e femulimulia'i e saili se ala e fa'aolaina ai le tagata agasala, afai e salamō le tagata agasala e to'atasi, e vivi'i agelu o le lagi ma olioli le finagalo o lona tamā auā ua fa'aolaina lea tagata, nai lo tagata e taulagi lo latou fa'amaoni ma le amiotonu e latou lava i luma o tagata, a'o totonu e tumu i le eleelea ma le pi'opi'o e pei o le au Faresaio.

A'oa'oga:

1. Aua ne'i manatu lava se tasi o ia ua lelei ma amiotonu, auā e leai lava se tasi ua mamā ua na o le Ali'i (Iesu) e leai sona ponā, ma sona leaga.
2. Aua le tu'ua'i le leaga i nisi, auā e te le iloa e sili atu lou leaga nai lo lena uso.
3. E alofa le Atua i tagata uma auā na ia faia i lona fa'atusa. E alofa le Atua i le tagata amiotonu ae sili ona alofa o ia i le tagata agasala, na te le tu'ua le tagata agasala ae taumulimuli lona alofa ina ia toe aumai lea tagata ina ia fa'aolaina.

Galuega Fa'atino: Fa'amatala mai po'o ai ia tagata ua ta'ua o Faresaio, ae o a foi a latou galuega e fai ma o latou uiga fa'aalia.

Pese: Ua ou filifili, e mulimuli ia Iesu
 Ua ou filifili, e mulimuli ia Iesu
 Ou te le toe foi x2

Tatalo: Fa'afetai Iesu auā e ui lava ina o matou agasala pea i aso uma, ae e te le finagalo lava ia fano i matou o lau fanau, fa'afetai alofa, viia lou agalelei Tamā...Amene.

Ia manuia le Aso Sa!!

Iuni 21, 2020

Mataupu: “O LE TA’ITA’INA FA’ATAMĀ.” (Aso Sa o Tamā)

Tusi Faitau: II Samuelu 13:23-39

Sini: Ia a’oa’o le fanau ia latou iloa ona fautua i o latou matua ina ia maua ni avanoa lelei e latou te mafuta ai i le aiga i aso uma.

Fesoasoani mo le Faiaoga:

Talu ai o le Aso Sa lenei o tamā, ae e sili ai ona fa’atalatalanoa muamua tamaiti i ni uiga o latou tamā e vaaia i totonu o latou aiga i aso uma, ona faigofie foi lea ona manino lau taumafaiga i le fa’amatalaina o le mataupu. Ia manuia lau galuega i lenei Aso Sa.

Sina fesoasoani mo le Mataupu:

1. E fa’amamafa i le mataupu lenei le tulaga o Tavita o ia o le tamā. O ia o le tupu iloga i le tala fa’asolopito o Isaraelu. O le tupu sa ta’uta’ua ona sa mata’u i le Atua, auā sa fesili i le Atua i mea uma. E ui lava la i lelei o Tavita, ae ua aliali mai i le tusi faitau, ua le fealofani ma ua fevaevaea’i lana fanau, ua i’u ina fasioti e le uso le isi uso, o lona uiga e i ai se fa’aletonu o le tamā i le va ma le fanau.
2. O Tavita o ia o le tupu, ua pisi lona mafaufau i le tele o ona tiute tau tupu ua alu uma ona taimi i le tele o ana galuega tau le fa’aleleia o le malo, ua ia malamalama lelei foi i so’o se vaipanoa o lona malo, ae misi atoa, na te le iloa le manu’a o lo’o i lona lotoifale, na te le o silafia le fa’aletonu o i lona lava aiga, ua fevaevaea’i ma le fealofani le fanau, ua i’u ina fasioti e le uso le uso, ua liliu mai ma fa’ataute’e i le tamā.
3. Ua fasioti e Apisaloma lona uso o Amanono ona o lona tigā ua leva ona tauave mai ona o le mea leaga a Amanono lona lava uso sa fai i lo la tuafafine o Tamara (II Samuelu 13:14, 32).
4. Ou te manatu ana fai e mafuta le tamā ma talatalanoa ma lana fanau, atonu ua leva ona ia silafia ni fa’aletonu i le va o fanau, e le taumate ua leva ona fofō ia fa’afitauli a’o le’i o’o ina fanau mai le fevaevaea’i ma le oti ma o’o atu ai lava le fanau i le lē usiusita’i ma o’o ai ina liliu mai ma fa’ataute’e i le tamā e pei ona faia e Apisaloma.
5. I le fuaiupu e 36, Fai mai le tala sa fetagisi leo tetele le fanau a Tavita atoa ma ana auauna fa’atasi Tavita ina ua oti Amanono. Talofa ia Tavita e toe tagi fua ua le aogā ua tuai, ua ui le ma’i, sa tataua ona fofō a’o laititi. Fa’amata o ni loimata o se alofa? Ia tailo, ana o se alofa moni i le fanau manū o mao’ona le fanau i ni a’oa’iga ma ni fautuaga lelei, atonu e le o’o ai ina le fealofani ma feaina’i, ana o se tamā sa masani ona mafuta ma lana fanau se manū ua leva ona ia silafia ni fa’aletonu ma ni vaivaiga o lana fanau, manū ua leva ona fo’ia fa’afitauli e tutupu i totonu o lona aiga.

A’oa’oga: O le fa’afitauli foi lea o lo’o tupu nei i lo tatou atunu’u, ua tele le lē usiusita’i o fanau i matua. O nisi fanau ua liliu ma fa’ataute’e i matua, a otegia pe sasa e le tamā po’o le tinā ua oso i le tulafono, talofa i le mata’utia o le mea ua tupu mai i fanau a le atunu’u, o le a le mafuaaga? O le tamā ma le tinā, ua ave uma o la taimi i tiute ma tofi e pei o Tavita, ae ua seaseā po’o le matuā

leai lava foi o se taimi se'i mafuta ai ma le fanau, se'i avatu se upu fa'atonu ma se a'oa'iga, ma se'i fa'alogo ma lagona leo o fanau. O le mafuaaga lena o le tupu tele o le lē usiusita'i o fanau ma fa'ataute'e i matua i aso nei, a fa'aletonu foi le ta'ita'iga a le tamā ua leaga le aiga ae a lelei ua manuia le aiga. O le ala foi lena o le fevaevaea'i o le fanau a Tavita.

Galuega Fa'atino: Ona o le Aso Sa lenei o Tamā, manaia foi ae fai sina ata pu'upu'u o le tala lea ia Tavita ma lana fanau.

Pese: A iai Iesu i se tamā, o se aiga
Aiga fiafia, aiga fiafia
A iai Iesu i se tamā, o se aiga
Aiga fiafia.

Tatalo: Saunia e se tama'ita'i.

Ia manuia le Aso Sa o Tamā!!

Iuni 28, 2020

Suega mo le afa muamua

Mo Faiaoga:

Malo lava le galulue fa'afetai fai o le faiva, ua fa'aifo foi le taulaumea e ala i galuega fa'atino o lenei foi afa muamua o le tausaga. Ae o le tatou suega fa'ai'u lenei o le afa muamua, afai lava sa fa'amaoni ona fai suega i masina ta'itasi, ou te talitonu le o lo'o iai fa'amaumauga o togi a tamaiti, e lelei ona tu'u fa'atasi uma ma togi o le suega mulimuli ona silasila lea iai ma fua iai le tou fa'aiuga po'o ai e maualuluga togi. Ae saunia lelei e tou susuga ni fa'ailoga mo nai tamaiti. Fai atu ai foi. Ia manuia lau tapenaga.

FESILI:

1. Aisea ua afio mai ai Iesu i le lalolagi?
2. O fea le faitoto'a tatou te ui ai ina ia tatou o'o i le malo o le Atua?
3. O le a le uiga o le fa'ataoto a Iesu i le mamoe na se?
4. O ai ia tagata ua ta'ua o Faresaio?
5. O le a se manatu o Faresaio i a'i latou lava?
6. O le au Faresaio ma au Tusi upu o tagata e matuā talitonu ia Iesu. [Sa'o / Sese]
7. O le alofa fa'a-le-Atua e tutusa ai tagata uma. [Sa'o / Sese]

8. E fiafia le Atua i matua ua tu'utia'i a latou fanau i le tele o taimi ae fa'amuamua mea latou te manana'o i ai. [Sa'o / Sese]
9. E mafua ona tutupu fa'afitauli i fanau ona o le lē lava o le taimi e mafuta ai ma matua. [Sa'o / Sese]
10. O le a se feau ua e maua mai i mataupu po'o tala sa fa'amatalaina i lenei Masina?

Fa'afetai tele mo la outou pitolaau sa so'oso'o tau'au mai ai ae a le galuega e le faigofie e ala lea i le fa'amatalaina o mataupu a le fanau, ia manuia tele le alo atu mo le malologa o Aoga Aso Sa ma Autalavou i lenei foi vaiseuga o le tausaga, ma ia fa'amanuia le Atua i fa'amoemoega uma o le a feagai ai. Ia manuia foi le alo atu o le Ekalesia Aoa mo le Fono Tele o lenei tausaga. Ia saunia se pese ma fai se tatalo e fa'ai'u ai le vasega.

Ia manuia tele le Aso Sa!!!





Tautua Printing Press
Congregational Christian Church of American Samoa
1 Kanana Fou Street, Box 1537
Pago Pago, American Samoa 96799
www.efkasonline.org